



## **PROPOSTAS DE EN MAREA DEN 2019**

### **SUMARIO**

- 1- ACORDO SOCIAL GALEGO CONTRA O CAMBIO CLIMÁTICO**
- 2- DECLARACIÓN DO PAÍS EN RISCO DE EMERXENCIA CLIMÁTICA**
- 3- PLAN DE CHOQUE CONTRA A PRECARIIDADE LABORAL**
- 4- SISTEMA INTEGRAL EFICAZ CONTRA A POBREZA E A EXCLUSIÓN**
- 5- MAPA DE TRANSICIÓN SOSTIBLE DE GALICIA**
- 6- MESA NACIONAL POLA CONCILIACIÓN**
- 7- PARQUE PÚBLICO DE VIVENDA**
- 8- PLAN DE MOBILIDADE SOSTIBLE**
- 9- NOVA REGULACIÓN DO SECTOR EÓLICO E PARALIZACIÓN DE PARQUES EÓLICOS EN REDE NATURA**
- 10-PLAN DE IMPULSO Á IGUALDADE E LOITA CONTRA AS VIOLENCIAS MACHISTAS**

- 11-DEFENSA DO SISTEMA PÚBLICO EDUCATIVO DA INFANCIA  
Á UNIVERSIDADE**
- 12-PLAN INTEGRAL DE ATENCIÓN Á DEPENDENCIA**
- 13-RECUPERACIÓN DE DEREITOS DO PERSOAL PÚBLICO**
- 14-DEFENSA DO SISTEMA PÚBLICO DE PENSÍONS**
- 15-PLAN DE MELLORA INTEGRAL DA SANIDADE PÚBLICA**
- 16-ATENCIÓN PRIMARIA DIGNA**
- 17- MEDIOS PÚBLICOS DE COMUNICACIÓN  
INDEPENDENTES, PLURAIS, DE CALIDADE**
- 18- PLAN DE IMPULSO DA LINGUA GALEGA**
- 19- LEI DE ORDENACIÓN DO TERRITORIO E USOS DO SOLO.**
- 20- APOIO ÁS COMUNIDADES DE MONTES VECIÑAIS EN MAN  
COMÚN**
- 21- REFORZAR O SERVIZO DE PREVENCIÓN E DEFENSA  
CONTRA INCENDIOS FORESTAIS**
- 22- SOBRE OS CENTROS DE FORMACIÓN PÚBLICOS DE  
INVESTIGACIÓN AGARIO FORESTAL**
- 23- SOBRE O EMPREGO GLIFOSATO**
- 24- SOBRE O NOVO “O PLAN FORESTAL”**
- 25- SOBRE O ACCESO Á TERRA**
- 26- SOBRE A PERDA DE EXPLOTACIÓNS E A DESAPARICIÓ  
DAS OFICINAS AGRARIAS COMARCAIS**
- 27- SOBRE O APOIO AO SECTOR LÁCTEO E HORTÍCOLA**
- 28- SOBRE A LEI DE TITULARIDADE COMPARTIDA E SOBRE  
O PAPEL DA MULLER NO RURAL.**
- 29- SOBRE A NOVA PAC**
- 30- SOBRE UN NOVO PLAN DE DESENVOLVEMENTO  
INDUSTRIAL DE GALICIA**

- 31- SOBRE UN PLAN DE FOMENTO DAS EXPORTACIÓNS**
- 32- SOBRE A CONEXIÓN DOS PORTOS PRINCIPAIS GALEGOS COA REDE EUROPEA DE TRANSPORTE DE MERCADORÍAS.**
- 33- SOBRE O PLAN GALEGO DE REHABILITACIÓN ENERXÉTICA DOS EDIFICIOS.**
- 34- SOBRE A POTENCIACIÓN DA FP2 E FP3 NO EIDO DA INSTALACIÓN E O MANTEMENTO DE INSTALACIÓNS DE ENERXÍAS RENOVABLES E DO TRANSPORTE ELÉCTRICO.**
- 35- SOBRE A APROBACIÓN INMEDIATA DO ESTATUTO DAS INDUSTRIAS ELECTROINTENSIVAS TENDO EN CONTA TODAS AS ALEGACIÓNS PRESENTADAS E CAMBIO DA REGULACIÓN DO SECTOR ELÉCTRICO PARA BAIXAR O RECIBO AOS FOGARES E AS EMPRESAS**
- 36- SOBRE OS SERVIZOS COMUNITARIOS DE ATENCIÓN TEMPERÁ EN TODO O PAÍS**
- 37- SOBRE A POTENCIACIÓN DO I+D+i CO OBXETIVO DE CHEGAR AO 2% DO PIB EN 4 ANOS. CON ESPECIAL INCIDENCIA NAS ENERXÍAS RENOVABLES, A EFICIENCIA ENERXÉTICA E A SOSTIBILIDADE EN XERAL. NO MESMO XEITO ENFOCAR NA INDUSTRIA MANUFACTUREIRA DE DERIVADOS DA AGROGANDEIRÍA.**
- 38- SOBRE A ELABORACIÓN DUN NOVO PLAN DE REDE E DE ACCESO GARANTIDO A BANDA LARGA EN TODA GALICIA.**
- 39- SOBRE A ELABORACIÓN DUN PLAN DE ACTUACIÓN URGENTE PARA PALIAR OS EFECTOS DO BREXIT CON ESPECIAL INCIDENCIA NO SECTOR DA PESCA.**
- 40- SOBRE OS DEREITOS CÍVICOS E POLÍTICOS**

## **Proposta de resolución nº 1**

### **ACORDO SOCIAL GALEGO CONTRA O CAMBIO CLIMÁTICO**

O Parlamento de Galicia insta a Xunta de Galicia a promover un gran acordo social galego contra o cambio climático, composto polos seguintes puntos:

- Comezar un proceso de descarbonización do país que implique a eliminación paulatina do carbón como fonte de enerxía, así como, na medida en que hai postos de traballo en xogo, implantar outras medidas que xeren novos ocupados atendendo prioritariamente ao traballo feminino.
- Reconsideración e redución dos tempos de traballo no sector público e nas empresas, xerando horas dispoñibles para satisfacer as necesidades de conciliación familiar.
- Comprometerse a que antes de rematar o novo decenio, o 100% do consumo eléctrico que fagamos proceda de fontes renovables.
- Un programa de investimentos en mobilidade do futuro, que reduza a dependencia do coche e apostar polo deseño do coche e bus eléctrico e híbrido así como coas infraestruturas para a súa implantación.
- A emisión dun “bono verde”, un bono de débeda que permita financiar investimentos en economía verde.
- Unha nova fiscalidade baseada na creación de novos impostos verdes pero especialmente en fomentar e premiar as novas iniciativas.

- Compra pública ecolóxica: o sector público debe integrar a compra de servizos en lugar de produtos, téxtiles ecolóxicos, fomentar o abastecemento de colexios e residencias mediante produtos locais e de temporada.
- Liñas de axuda económica e regulacións para desenvolver actividades produtivas relacionadas coa bioeconomía. Cadeas rurais de valor e redes de produción locais que aproveiten os bio-produtos.
- Liñas de axuda para transformar o sector da construción cara un modelo que fomente a implantación de novos materiais, minimizar residuos, eficiencia enerxética e uso eficiente da auga.
- Investimento nun I+D+i verde. Por unha banda a través de proxectos que teñan como obxectivo desenvolver coñecemento avanzado para unha sociedade “verde” e por outra, fomentar a innovación das empresas co obxectivo de que lles permita gañar maior competitividade a través de procesos de produción máis limpos.

## **Proposta de resolución nº 2**

### **DECLARACIÓN DO PAÍS EN RISCO DE EMERXENCIA CLIMÁTICA**

O Parlamento de Galicia insta a Xunta de Galicia a declarar Galicia como País en risco de Emerxencia Climática, por estar ameazada toda a sociedade en xeral e tamén o mundo natural, e a implementar un plan, nesta lexislatura, para revitalizar o medio rural galego, traballando á escala adecuada (proximidade, comarcalización) na administración dos recursos agrarios e forestais, así como a elaborar, no prazo máximo de 6 meses, unha estratexia para reforzar a prevención de incendios forestais, tanto con medios persoais como materiais e económicos, reformulando o actual sistema de extinción, a ter en conta na aprobación do PLADIGA 2020, e a elaborar, no prazo máximo de 6 meses, un plan para impulsar a autoxeración e o autoconsumo de enerxía solar e xeotérmica.

### **Proposta de resolución nº 3**

#### **PLAN DE CHOQUE CONTRA A PRECARIIDADE LABORAL**

O Parlamento de Galicia, recoñecendo a precariedade laboral como un dos problemas máis graves do pobo galego a nivel social e económico, insta á Xunta de Galicia a impulsar un Plan de Choque para combater a precariedade laboral, comprometéndose, no prazo máximo de seis meses, a convocar a sindicatos e organizacións empresariais no marco galego para deseñar dito plan, con cronograma e partidas orzamentarias, incluíndo medidas específicas contra a explotación laboral, aumentando a inspección e solicitando ao Estado a transferencia de competencias en materia de Inspección de Traballo, unha estratexia de fomento do emprego, especialmente o da mocidade, o feminino, o de maiores de 45 anos e o das persoas con discapacidade, así como trasladar ao Goberno do Estado a petición de derogación da Lei 3/2012 da reforma laboral.

#### **Proposta de resolución nº 4**

### **SISTEMA INTEGRAL EFICAZ CONTRA A POBREZA E A EXCLUSIÓN**

O Parlamento de Galicia insta a Xunta de Galicia a impulsar un Plan Integral contra a Pobreza e Exclusión, aumentando o orzamento para nas funcións de loita contra a Exclusión Social para impulsar, antes de 2022, un sistema de renda de complemento de ingresos eficaz e inclusivo, desenvolvendo unha prestación garantida de dereito subxectivo, vinculada á carencia de rendas, para acadar a promoción da persoa e o seu empoderamento, superando as condicións que a levaron a precisar dita prestación, incluíndo no Plan medidas de choque específicas contra a feminización da pobreza.



## **Proposta de resolución nº 5**

### **MAPA DE TRANSICIÓN SOSTIBLE DE GALICIA**

O Parlamento de Galicia insta a Xunta de Galicia a desenvolver o Mapa de Transición Sostible de Galicia (CLEW-Galicia) e os proxectos piloto para as hipercomarcas de Ferrolterra-As Pontes-Eume-Ortegal e Cerceda-Ordes-Terras de Melide-Arzúa, baseándose en modelos xa existentes en varias rexións europeas.

## **Proposta de resolución nº 6**

### **MESA NACIONAL POLA CONCILIACIÓN**

O Parlamento de Galicia insta a Xunta de Galicia a constituír, no prazo máximo de seis meses, unha mesa de negociación coa representación dos sindicatos e empresariado para acordar as medidas dirixidas a mellorar a conciliación laboral, familiar e persoal, incluíndo racionalización de horarios e corresponsabilidade, así como a dotación de garderías en parques empresariais e centros de traballo público, que, tanto a Administración como o sector privado se comprometan a cumprir, ademais de desenvolver un calendario de actuacións, obxectivos concretos a cumprir e partidas orzamentarias.

## **Proposta de resolución nº 7**

### **PARQUE PÚBLICO DE VIVENDA**

O Parlamento de Galicia insta á Xunta de Galicia a impulsar, mediante o aumento da promoción, adquisición de inmobles e rehabilitación, un verdadeiro parque público de vivenda de aluguer social que permita acoller a demanda de vivenda protexida existente e futura.

## **Proposta de resolución nº 8**

### **PLAN DE MOBILIDADE SOSTIBLE**

O Parlamento de Galicia insta a Xunta de Galicia a desenvolver, en colaboración co Goberno do Estado, un Plan de Mobilidade Sostible.

- Cun renovado FEVE que unise Ferrol e Ribadeo como tren de cercanías.
- Cercanías entre Ferrol e Coruña.
- Tren que vertebre o eixo Coruña-Lugo-Ourense-Santiago como o que hai entre a cidade herculina e Vigo.
- Conexión do eixo atlántico cos aeroportos galegos. Tendo tres aeroportos ningún ten estación de tren

## **Proposta de resolución nº 9**

### **NOVA REGULACIÓN DO SECTOR EÓLICO E PARALIZACIÓN DE PARQUES EÓLICOS EN REDE NATURA**

O Parlamento de Galicia insta a Xunta de Galicia a desenvolver un novo regulamento do sector eólico en Galicia que poña no centro os intereses das comunidades nos que se instalan e nas súas comarcas, o seu crecemento e os retornos económicos, a protección do medioambiente, a paisaxe e o patrimonio. e, como compromiso de inicio de dito plan, paralizar a realización das obras de todos os parques eólicos afectados pola Rede Natura, como sucede co da Serra do Iribio, así como a realizar cantas actuacións sexan precisas para preservar a riqueza ambiental e patrimonial do seu entorno.

## **Proposta de resolución nº 10**

### **PLAN DE IMPULSO Á IGUALDADE E LOITA CONTRA AS VIOLENCIAS MACHISTAS**

O Parlamento de Galicia insta a Xunta de Galicia a impulsar, no prazo de seis meses, un Plan cuadriannual de impulso á Igualdade e de loita contra as violencias machistas, dialogado coas organizacións e asociacións feministas galegas, así como cos axentes sociais e forzas políticas, con cronograma e partidas orzamentarias, que, partindo do aumento orzamentario de todos os programas relativos á promoción da Igualdade e loita contra a violencia de xénero, impulse medidas específicas, entre as cales, canto menos, estarán:

- Plan especial de loita contra o aumento da violencia machista delitos contra a liberdade sexual entre a mocidade, que inclúa o desenvolvemento da educación afectivo-sexual no sistema educativo.
- Plan integral de promoción da Igualdade no medio rural, atendendo as necesidades de conciliación e as maiores dificultades de acceso aos recursos de apoio a vítimas de violencia machista no rural.
- Aumento dos fondos para a integración e promoción laboral das vítimas.
- Aumento da rede de apoio psicosocial a menores vítimas.
- Aumento dos recursos de casas de acollida para vítimas ata ter unha rede suficiente en todo o territorio.

## **Proposta de resolución nº 11**

### **DEFENSA DO SISTEMA PÚBLICO EDUCATIVO DA INFANCIA Á UNIVERSIDADE**

O Parlamento de Galicia insta a Xunta de Galicia a aumentar a porcentaxe de PIB dedicada á Educación, como mínimo ata o 5%, para impulsar a calidade educativa en todos os niveis, aprobando, en 2020, plans que garantan o desenvolvemento dos seguintes eixos:

- Rede pública e gratuíta de ensino infantil 0-3 anos, integrada na Consellería de Educación, como etapa educativa, de xeito que se garanta a súa universalización.
- Eliminación dos concertos educativos con centros que segregan por sexos.
- Aumento de profesorado e do persoal de atención ás necesidades educativas especiais
- Introducción da Educación Social no eido educativo.
- Apertura dun proceso de diálogo coas universidades públicas galegas para aumentar o seu financiamento e oferta de titulacións, así como para o deseño dun sistema propio de axuda aos estudos, desbotando o anteproxecto de lei para a autorización dunha universidade privada en Galicia.
- Impulso dunha Mesa polo Ensino Rural, á que se convoque a todos os axentes implicados para acadar acordos que retrocedan a redución de recursos educativos no medio rural e que garantan a presenza de toda a oferta educativa formal no rural, ademais de elaborar un Plan de Educación específico para o Rural.

## **Proposta de resolución nº 12**

### **PLAN INTEGRAL DE ATENCIÓN Á DEPENDENCIA**

O Parlamento de Galicia insta a Xunta de Galicia a impulsar unha estratexia global de mellora da situación das persoas dependentes e das súas cuidadoras, desenvolvendo de xeito pleno a Lei 39/2006, de 14 de decembro, de Promoción da Autonomía Persoal e Atención ás persoas en situación de dependencia, aumentando no inmediato a achega orzamentaria da Comunidade Autónoma e reducindo a lista de agarda para a valoración e asignación de recursos, reclamando do Estado o aumento da financiación, para aumentar a contía das libranzas para coidados, desenvolver programas de profesionalización de persoas cuidadoras, así como reforzar os servizos sociais comunitarios e a atención/intervención temperá na rede sociosanitaria pública para persoas dependentes, aumentando o número de horas de SAF nos Concellos para Dependencia, ampliando as prazas de respiro familiar e a rede pública de centros de día e residencias de maiores, aumentando as rateos de persoal nas mesmas, e desenvolvendo un protocolo de atención a persoas maiores en situación vulnerable que viven soas.



### **Proposta de resolución nº 13**

#### **RECUPERACIÓN DE DEREITOS DO PERSOAL PÚBLICO**

O Parlamento de Galicia insta a Xunta de Galicia a deixar sen efecto a suspensión do artigo 19 do Vº Convenio Único do Persoal Laboral da Xunta de Galicia, así como a recuperar todos os dereitos e poder adquisitivo perdido dende o ano 2010 polo persoal público, ademais de impulsar plans de creación e estabilización de emprego público.

## **Proposta de resolución nº 14**

### **DEFENSA DO SISTEMA PÚBLICO DE PENSIÓNS**

O Parlamento de Galicia asume a defensa do sistema público de pensións e da blindaxe legal da actualización das pensións conforme ao IPC real, instando á Xunta de Galicia a trasladar ao Goberno do Estado a necesidade de derrogar as reformas das pensións de 2011 e 2013, reducir a idade de xubilación, mellorar as condicións de acceso á pensión e, ademais de mecanismos de redistribución de riqueza (eliminación dos topes de cotización, mellora dos ingresos do sistema derivados das cotizacións e dos ingresos fiscais), introducir a financiación vía impostos, a través dos orzamentos, blindando as pensións como unha prestación social fundamental, defendendo, ademais a devolución das sancións a emigrantes retornadas e a homologación das súas pensións de incapacidade, e que o Estado español se persoe perante o Tribunal Europeo dos Dereitos Humanos para denunciar a discriminación por razón de nacionalidade que levou a cabo o Goberno de Noruega en materia de pensións cos mariñeiros do colectivo Long Hope.

## **Proposta de resolución nº 15**

### **PLAN DE MELLORA INTEGRAL DA SANIDADE PÚBLICA**

O Parlamento de Galicia insta a Xunta de Galicia a incrementar o orzamento da Sanidade pública, para rematar coa privatización de servizos e negociar un Plan de Estabilidade laboral para rematar coa alta temporalidade no SERGAS, ademais de impulsar un plan para o desenvolvemento da extensión da prestación pública de saúde bucodental e o aumento de recursos para a atención a saúde mental, así como un plan de atención directa dende o SERGAS de todos os trastornos aditivos.

## **Proposta de resolución nº 16**

### **ATENCIÓN PRIMARIA DIGNA**

O Parlamento de Galicia insta a Xunta de Galicia a impulsar melloras substanciais na Atención Primaria de Saúde, dotándoa cun 25% do orzamento sanitario e recuperando as súas estruturas de xestión propias, ademais de establecer un cupo máximo de 1250 pacientes por profesional, limitar a 30 o máximo de citas por día, cubrir as ausencias de profesionais en todas as categorías e impulsar unha OPE das vacantes, así como xeralizar a dotación de máis servizos.

## **Proposta de resolución nº 17**

### **MEDIOS PÚBLICOS DE COMUNICACIÓN INDEPENDENTES, PLURAIS, DE CALIDADE**

O Parlamento de Galicia comprométese a iniciar un proceso de diálogo para impulsar un concurso público para a renovación da Dirección da CRTVG e renovar o seu Consello de Administración, ademais de promover as modificacións legais precisas e dirixirse ao Consello de Administración para, en cumprimento da actual Lei 9/2011 de medios públicos de comunicación audiovisual de Galicia, se poña fin ao uso partidario dos medios públicos de comunicación social e garantir unha información independente, esmerada, completa, plural e veraz á cidadanía, atendendo a todas as franxas de idade e aos diferentes ámbitos sociais e territoriais, instando, ademais a cumprir a Lei 7/2010, de 31 de marzo, Xeral da Comunicación Audiovisual, en materia de accesibilidade, aumentando o número de subtitulación para persoas xordas na TVG até cubrir o 75% da programación total antes de 2021.

## **Proposta de resolución nº 18**

### **PLAN DE IMPULSO DA LINGUA GALEGA**

O Parlamento de Galicia insta a Xunta de Galicia a cumprir co estipulado na Lei 3/1983 de normalización lingüística e no Plan Xeral de Normalización Lingüística, como paso previo á actualización deste último, mediante orzamentos suficientes que garantan o impulso da extensión do uso social do galego, a dinamización lingüística entre a mocidade e a infancia, a garantía dos dereitos lingüísticos en todos os eidos, especialmente no xudicial e no económico, o cumprimento da Lei 1/2014 para o aproveitamento da lingua portuguesa e a derogación do Decreto 79/2010 para o plurilingüísmo, establecendo un marco que garanta unha presenza mínima da lingua galega no ensino infantil, primario e secundario, de xeito que sexa a lingua vehicular.

## **Proposta de resolución nº 19**

### **LEI DE ORDENACIÓN DO TERRITORIO E USOS DO SOLO.**

O Parlamento de Galicia insta a Xunta de Galicia a redefinir o solo urbanizable na Lei 2/2016 restrinxindo as posibilidades de recalificacións de solo rústico loitando contra a expansión urbanística cara terreos de elevada produtividade agraria, forestal ou paisaxística e a elaborar un mapa de usos de solo de Galicia elaborado por comarcas, que inclúa un Catálogo de Chan de Alta Produtividade Agropecuaria e que sirva de base para unha planificación dos usos a medio e longo prazo

## **Proposta de resolución nº 20**

### **APOIO ÁS COMUNIDADES DE MONTES VECIÑAIS EN MAN COMÚN**

O Parlamento de Galicia insta a Xunta de Galicia a realizar un Plan de revitalización de Montes Veciñais en Man Común, fronte á dinámica do abandono da Xunta de Galicia. Debe implementarse un plan baseado na cooperación, no diálogo e no coidado e tutela, que aporte recursos humanos e orzamentarios para revitalizar as comunidades de veciños e mellorar a súa xestión. Os MVMC son unha oportunidade para a fixación de poboación no rural.



## **Proposta de resolución nº 21**

### **REFORZAR O SERVIZO DE PREVENCIÓN E DEFENSA CONTRA INCENDIOS FORESTAIS**

O Parlamento de Galicia insta a Xunta de Galicia a acabar coa atomización do dispositivo de prevención e extinción de incendios e retomar o control dos lumes ao dispositivo do SPDCIF, e a substituír aos efectivos da UME e a Operación Sentinela por persoal do servizo público do SPDCIF para as labores de extinción de incendios forestais na Comunidade galega.

**Proposta de resolución nº 22**

**SOBRE OS CENTROS DE FORMACIÓN PÚBLICOS DE  
INVESTIGACIÓN AGARIO FORESTAL**

O Parlamento de Galicia insta a Xunta de Galicia a restablecer os niveis de persoal nos centros públicos de investigación agrario e forestal, reforzando a formación agroforestal e gandeira.

## **Proposta de resolución nº 23**

### **SOBRE O EMPREGO GLIFOSATO**

O Parlamento de Galicia insta a Xunta de Galicia a prohibir o emprego de fitocidas, especificamente herbicidas como glifosato, que deixan biomasa seca a disposición de arder, que axudan á ignición e á propagación dos incendios forestais, facendo fincapé en cunetas e devasas nas que pon en perigo a poboación e o medio ambiente.

## **Proposta de resolución nº 24**

### **SOBRE O NOVO “O PLAN FORESTAL”**

O Parlamento de Galicia insta a Xunta de Galicia a non permitir a utilización de cultivos enerxéticos para a produción de biomasa, ao cumprimento da Lei de Montes de Galicia, Lei de Incendios forestais de Galicia e Lei de Conservación da Natureza para limitar a plantación de eucaliptos en zonas de protección medioambiental, terreos agrícolas ou faixas de protección, erradicando esta especie nas zonas ocupadas, a implementar medidas para a promoción de bosques autóctonos ou madeiras nobres autóctonas que poidas servir para a fabricación de tableiros de madeira, a deixar a 0 o incremento que inclúe o borrador da superficie de eucaliptos do 8, 12%, isto é, de 25.000 hectáreas, así como o incremento de masas mixtas, a garantir a recuperación de terreos forestados ilegalmente, e a garantirse unha xestión sustentable do monte, dende o punto de vista social, ambiental e económico, así como blindar a paisaxe de mosaico tan característica do noso país.

## **Proposta de resolución nº 25**

### **SOBRE O ACCESO Á TERRA**

O Parlamento de Galicia insta a Xunta de Galicia a facilitar o acceso a terra para a produción de alimento e garantir unha Superficie Agraria Útil (SAU) suficiente para as granxas galegas e a aposta polos usos gandeiros, sobre todo en extensivo e de pasto, e agrícolas recuperando e aumentando terreos aptos para estes usos.

## **Proposta de resolución nº 26**

### **SOBRE A PERDA DE EXPLOTACIÓNS E A DESAPARICIÓ N DAS OFICINAS AGRARIAS COMARCAIS**

O Parlamento de Galicia insta a Xunta de Galicia a implementar medidas eficaces para frear a perda de explotacións, SAU e UTA´s no noso agro e a dotar de persoal propio ás Oficinas Agrarias Comarcais e non desmantelar un servizo tan necesario para dous dos sectores que manteñen a este e a todos os países do mundo en pé: o agrario e o gandeiro.

**Proposta de resolución nº 27**

**SOBRE O APOIO AO SECTOR LÁCTEO E HORTÍCOLA**

O Parlamento de Galicia insta a Xunta de Galicia a intervir na cadea do leite e garantir o futuro do sector lácteo galego mediante o pago aos produtores dun prezo sostible polo leite e a poñer en marcha un plan para potenciar a horticoltura, fruticultura, e agricultura ecolóxica.

## **Proposta de resolución nº 28**

### **SOBRE A LEI DE TITULARIDADE COMPARTIDA E SOBRE O PAPEL DA MULLER NO RURAL.**

O Parlamento de Galicia insta a Xunta de Galicia a realizar un Plan de accións que melloren a aplicación da Lei 35/2011 de Titularidade Compartida das Explotacións, a elaborar un plan integral para a promoción das mulleres do medio rural antes de que remate a lexislatura, a instar a todas as institucións e administracións públicas a que promovan, desenvolvan e poñan en marcha todas as medidas legais posibles destinadas a proporcionar un trato xurídico igualitario ás mulleres que se dedican ao sector primario no medio rural, a propiciar cantas accións sexan posibles de cara ao recoñecemento e visibilización das mulleres, é dicir, o seu apoderamento, ante calquera situación e en calquera ámbito, a impulsar políticas activas e as axudas necesarias que permitan compaxinar a vida laboral no campo coa actividade familiar e a adoptar as medidas tendentes a mellorar as cotas femininas nas organizacións agrarias e gandeiras, como medio para lograr un trato equilibrado e igualitario no sector.



## **Proposta de resolución nº 29**

### **SOBRE A NOVA PAC**

O Parlamento de Galicia insta a Xunta de Galicia a dirixirse ao Goberno do Estado para aportar as modificacións ao Regulamento UE n.º 1308/2013 de xeito consensuado cos sectores agrícolas e gandeiros, e coas especificidades de Galicia como zona especialmente desfavorecida pola súa orografía, a dispersión poboacional e coa elaboración dun plan segundo as Rexións, con adaptación das boas prácticas agrarias ás circunstancias climáticas, orográficas e segundo o tamaño das explotacións, nomeadamente dun Plan Rexional Galego.

### **Proposta de resolución nº 30**

## **SOBRE UN NOVO PLAN DE DESENVOLVEMENTO INDUSTRIAL DE GALICIA**

O Parlamento de Galicia insta a Xunta de Galicia a desenvolver un novo Plan de desenvolvemento industrial de Galicia que dea a volta ao declive industrial actual cunha especial atención: as tecnoloxías presentes na transición ecolóxica:

- mobilidade eléctrica, especialmente na innovación no transporte colectivo eléctrico rodado na área metropolitana de Vigo;
- enerxías renovables, especialmente no desenvolvemento do hub da enerxía eólica mariña en Ferrolterra;
- eficiencia enerxética,
- as industrias derivadas do sector agrogandeiro e da pesca e
- as TIC.

## **Proposta de resolución nº 31**

### **SOBRE UN PLAN DE FOMENTO DAS EXPORTACIÓNS**

O Parlamento de Galicia insta a Xunta de Galicia a desenvolver un novo Plan de fomento das exportacións, sobre todo en mercados alleos a UE, para reducir a dependencia excesiva deste mercado e a dependencia tamén excesiva dos sectores téxtil e automobilístico. Con actuacións ante as PEMES co obxectivo de conseguir 2.000 novas empresas exportadoras sobre todo nos sectores presentes na transición ecolóxica e na industria agroalimentaria e pesqueira.

**Proposta de resolución nº 32**

**SOBRE A CONEXIÓN DOS PORTOS PRINCIPAIS GALEGOS COA REDE EUROPEA DE TRANSPORTE DE MERCADORÍAS.**

O Parlamento de Galicia insta a Xunta de Galicia a instar ao Goberno do Estado o remate das conexións dos portos principais coa rede Europea de transporte de mercancías.

**Proposta de resolución nº 33**

**SOBRE O PLAN GALEGO DE REHABILITACIÓN ENERXÉTICA DOS EDIFICIOS.**

O Parlamento de Galicia insta a Xunta de Galicia a desenvolver un Plan Galego de Rehabilitación enerxética dos edificios centrado en 5 eixos:

- Vivendas vulnerables ou con alto grao de deterioración.
- Edificios privados de residentes non vulnerables.
- Rehabilitación de edificios públicos.
- Rehabilitación de edificios comerciais ou de servizos.
- Edificios de nova construción. Edificios de Consumo Case Nulo (nZEB)

**Proposta de resolución nº 34**

**SOBRE A POTENCIACIÓN DA FP2 E FP3 NO EIDO DA INSTALACIÓN  
E O MANTEMENTO DE INSTALACIÓNS DE ENERXÍAS  
RENOVABLES E DO TRANSPORTE ELÉCTRICO.**

O Parlamento de Galicia insta a Xunta de Galicia á potenciación dos Ciclos de grao medio e superior de Formación Profesional no eido da instalación e o mantemento de instalacións de enerxías renovables e do transporte eléctrico. Este desenvolvemento farase con prioridade temporal de implantación nas comarcas máis afectadas polo impacto social e laboral da transición enerxética.

**Proposta de resolución nº 35**

**SOBRE A APROBACIÓN INMEDIATA DO ESTATUTO DAS INDUSTRIAS ELECTROINTENSIVAS TENDO EN CONTA TODAS AS ALEGACIÓNS PRESENTADAS E CAMBIO DA REGULACIÓN DO SECTOR ELÉCTRICO PARA BAIXAR O RECIBO AOS FOGARES E AS EMPRESAS**

O Parlamento de Galicia insta a Xunta de Galicia a instar ao Goberno do Estado a aprobación inmediata do Estatuto das Industrias Electointensivas tendo en conta todas as alegacións presentadas polos traballadores, as empresas e as organizacións políticas e o cambio da regulación do sector eléctrico para baixar o recibo aos fogares e as empresas.

**Proposta de resolución nº 36**

**SOBRE OS SERVIZOS COMUNITARIOS DE ATENCIÓN TEMPERÁ  
EN TODO O PAÍS**

O Parlamento de Galicia insta a Xunta de Galicia a desenvolver de xeito pleno a Rede Galega de Atención Temperá, cun plan de consolidación da mesma que garanta o despregamento de servizos comunitarios en todo o País, cun sistema de financiamento estable que garanta a estabilidade do persoal e a profesionalidade e coa elevación dos fondos destinados a este servizo, comezando por, canto menos, triplicar os fondos nos Orzamentos de 2020.



**Proposta de resolución nº 37**

**SOBRE A POTENCIACIÓN DO I+D+i CO OBTETIVO DE CHEGAR AO 2% DO PIB EN 4 ANOS. CON ESPECIAL INCIDENCIA NAS ENERXÍAS RENOVABLES, A EFICIENCIA ENERXÉTICA E A SOSTIBILIDADE EN XERAL. NO MESMO XEITO ENFOCAR NA INDUSTRIA MANUFACTUREIRA DE DERIVADOS DA AGROGANDEIRÍA.**

O Parlamento de Galicia insta a Xunta de Galicia á Potenciación do I+D+i co obxectivo de chegar ao 2% do PIB en 4 anos. Con especial incidencia nas enerxías renovables, a eficiencia enerxética, a sustentabilidade en xeral. No mesmo xeito enfocar na industria manufactureira de derivados do sector forestal e agrogandeiro. Todo elo incrementando os orzamentos destinados a este fin cunha execución completa.

**Proposta de resolución nº 38**

**SOBRE A ELABORACIÓN DUN NOVO PLAN DE REDE E DE ACCESO  
GARANTIDO A BANDA LARGA EN TODA GALICIA.**

O Parlamento de Galicia insta a Xunta de Galicia a desenvolver un Plan de rede e de acceso garantido a banda larga en toda Galicia. Desenvolver un plan de rede pública a través de Retegal para reducir a fenda dixital e garantir a banda larga de internet en todo o territorio galego, que se podería empregar por calquera operadora privada en réxime de concesión e/ou aluguer.

**Proposta de resolución nº 39**

**SOBRE A ELABORACIÓN DUN PLAN DE ACTUACIÓN URXENTE  
PARA PALIAR OS EFECTOS DO BREXIT CON ESPECIAL  
INCIDENCIA NO SECTOR DA PESCA.**

O Parlamento de Galicia insta a Xunta de Galicia a desenvolver un Plan de actuación urxente con dotación orzamentaria suficiente para paliar os efectos do Brexit sobre a economía de Galicia con especial incidencia no sector da pesca.

## **Proposta de resolución nº 40**

### **SOBRE OS DEREITOS CÍVICOS E POLÍTICOS**

O Parlamento de Galicia asume a necesidade de promover mecanismos que permitan o libre exercicio do Dereito a decidir dos pobos, recoñecendo o dereito a decidir como elemento clave do compromiso democrático dende os valores republicanos –condenando, polo tanto, os pactos coas forzas de ultradereita negacionistas dos dereitos civís-, que permita a modificación do marco constitucional para garantir a mellora das liberdades individuais e colectivas e lograr un incremento do nivel de vida e os dereitos sociais, culturais e laborais, solicitando, ademais, dos poderes do estado a execución de todos os mecanismos que permitan a inmediata liberación das persoas presas por defender as súas lexitimas conviccións políticas.

